

09.03 PROFIL

Marco Bass: «Jau hai gì il regl da midar professiun»

Avant prest 20 onns ha Marco Bass fatg la scolaziun sco sanitari da salvament. Oz lavura el en l'ospital a Tusaun. Pli baud n'avess el dentant betg pudì s'imaginar da far questa lavur, damai ch'el sa sentiva adina mal, sch'el veseva sang u infusiuns. Oz è Marco Bass sanitari cun corp ed olma.



L'emprendissadi ha el fatg sco electricist, lura reparà durant 10 onns da tuttas sorts maschinas. Tras in bun ami ha el chattà la via en il sectur da sanadad, in mund dal tuttafatg auter. Per pudair sa revegnir e vegnir sin auters patratgs scappa Marco Bass savens en il Tessin, nua ch'el e sia famiglia possedan dapi intgins onns ina rulotta ch'el ha transfurmà en ina pitschna chasa. Il clima, l'atmosfera e la vita en il Tessin cun il Lago Maggiore saja per el in paradis per puspè tancar nova energia. A cor a Marco Bass stat era la musica, cunzunt la musica instrumentala. Bliers onns è el stà commember da la societad da musica Sumvitg/Cumpadials. Oz suna el en la musica da la citad da Glion, nua ch'el è da chasa. Dapi prest 16 onns abitescha Marco Bass en la Via Schlifras, in quartier ruassaivel a l'ur da la citad. Per famiglias è il quartier ideal grazia a la vasta purschida en la vischinanza sco il bogn avert, las plazzas da ballape, las plazzas da giu, la scola e differentas butias.

Redacziun: Andreas Wieland